

28 DEC 1999

Mahathir-rampasan

MAHATHIR SEDIH PERISTIWA RAMPASAN PESAWAT

KUALA LUMPUR, 28 Dis (Bernama) -- Datuk Seri Dr Mahathir Mohamad berkata beliau dukacita dengan kejadian rampasan pesawat Indian Airlines pada Jumaat lepas.

"Saya amat sedih dengan apa yang berlaku," kata Perdana Menteri dalam satu temubual dengan Radio Television Malaysia (RTM) di Putrajaya hari ini.

Sebelum itu, RTM merakamkan perutusan Tahun Baru beliau.

"Tindakan mengambil tebusan bagi mendapatkan perkara tertentu adalah sesuatu yang malang," kata Dr Mahathir.

Menurut laporan, pesawat jenis Airbus-300 dengan 189 orang di dalamnya dirampas setelah ia berlepas dari lapangan terbang antarabangsa Tribhuvan di Kathmandu, Nepal.

Setelah mendarat di Amritsar, India dan di Emiriyah Arab Bersatu, kumpulan perampas itu membebaskan 27 penumpang dan juga mayat seorang penumpang warganegara India yang mereka tikam. Pesawat itu berlepas pula ke Kandahar di Afghanistan dan pegawai-pegawai India sedang berunding menerusi radio dengan perampas-perampas itu yang dipercayai sebanyak lima atau enam orang.

Dr Mahathir berharap rundingan itu akan menghasilkan penyelesaian.

Para perampas itu berkata mereka akan melepaskan semua tebusan jika India membebaskan pemimpin agama dari Pakistan Mohammed Azhar Masood, yang kini dalam penjara India kerana didakwa menggalakkan pemberontakan pemisahan di Kashmir.

Mereka juga mengancam untuk membunuh semua tebusan jika India gagal memenuhi tuntutan mereka.

Dr Mahathir berkata kejadian mengambil tebusan disebabkan oleh tindakan terdesak.

"Oleh kerana mereka tidak mendapat apa yang mereka inginkan, mereka menjadikan orang tidak berdosa sebagai tebusan. Ini amat malang sekali," katanya.

Perdana Menteri berkata apa yang berlaku di Afghanistan bukanlah satu perkara baru yang membabitkan tebusan.

"Adakalanya sesuatu bandar atau negara dijadikan tebusan," katanya.

Sebagai contoh, Dr Mahathir berkata beliau menganggap sekatan Bangsa-bangsa Bersatu terhadap Iraq "sebagai menjadikan rakyat Iraq tebusan supaya seseorang itu menyerah diri atau berundur."

"Ini jelas menunjukkan bahawa teladan seperti ini (menjadikan rakyat sebagai tebusan), akan diikuti oleh orang lain.

"Dunia perlu menjadi contoh bahawa tidak ada sesiapa termasuk negara-negara patut menjadikan negara atau orang lain sebagai tebusan untuk mencapai matlamat tertentu.

"Jika kita tidak hentikan amalan seperti ini, lebih banyak kejadian seumpama ini akan berlaku," katanya.

-- BERNAMA

ES MAI